

KENYATAAN MEDIA



KEMENTERIAN PERDAGANGAN DALAM NEGERI DAN HAL EHWAL PENGGUNA
No. 13 Persiaran Perdana, Presint 2,
62623 Putrajaya
No. Telefon : 03-8882 5562
No. Fax : 03-8882 5569

STESEN MINYAK DISYAKI MELAKUKAN AKTIVITI PENYELEWENGAN MINYAK DIESEL BERSUBSIDI DISERBU PENGUAT KUASA KPDNHEP

SEREMBAN, 13 April 2022 – Kementerian Perdagangan Dalam Negeri dan Hal Ehwal Pengguna (KPDNHEP) berjaya menumpaskan aktiviti penyelewengan minyak diesel bersubsidi dalam serbuan yang dilakukan ke atas sebuah stesen minyak di Pekan Teluk Kemang, Negeri Sembilan yang disyaki menjalankan aktiviti penyelewengan minyak diesel bersubsidi.

2. Serbuan dibuat oleh sepasukan anggota Penguat Kuasa dari KPDNHEP Putrajaya adalah hasil risikan yang telah dilakukan sejak beberapa minggu yang lalu. Ketika serbuan dilakukan ke atas stesen minyak tersebut, terdapat sebuah lori tangki sedang mengisi minyak di dalam tangki simpanan di stesen minyak berkenaan. Ketika serbuan pemandu lori terbabit membuat pengisian minyak berjumlah RM 500.00 bersamaan kira-kira 232 liter.

3. Hasil siasatan awal mendapati, disyaki pemandu lori terbabit telah mengisi dua (2) kali pengisian dengan jumlah setiap transaksi RM 500.00. Jumlah pembayaran bagi pengisian yang telah dibuat adalah sebanyak RM1,000.00 secara tunai. Hasil pemeriksaan lanjut mendapati sebuah *compartment* tangki simpanan mengandungi minyak diesel yang dianggarkan berjumlah 370 liter.

4. Minyak diesel, lori tangki, dua (2) unit telefon bimbit, satu set dekoder CCTV dan invois/resit jualan serta belian berserta dokumen-dokumen perniagaan yang lain dari stesen minyak berkenaan telah disita bagi tujuan siasatan lanjut. Nilai keseluruhan rampasan dianggarkan berjumlah RM 27,795.50.

5. Seorang lelaki warga tempatan berumur 30 tahun yang mengaku sebagai pemandu lori ditahan bagi membantu siasatan.

6. Kertas siasatan telah dibuka dan siasatan lanjut terhadap kes ini akan dibuat di bawah Akta Kawalan Bekalan (AKB) 1961 bagi mengenalpasti rangkaian pengedaran minyak diesel tersebut bermula daripada stesen minyak berkenaan sehinggalah ke peringkat pembeli.

7. KPDNHEP ingin memberikan amaran keras terhadap mana-mana pengusaha stesen minyak khususnya ke atas 24 stesen minyak di kawasan Port Dickson agar mematuhi perundangan. Mana-mana orang yang melakukan kesalahan boleh diambil tindakan di bawah AKB 1961 dan jika disabitkan boleh didenda tidak lebih RM 1,000,000.00 (Ringgit Malaysia Satu Juta) manakala bagi kesalahan berikutnya tidak melebihi RM 3,000,000.00 (Ringgit Malaysia Tiga Juta) bagi orang perseorangan atau penjara tidak melebihi tiga tahun atau kedua-duanya sekali manakala bagi syarikat sekiranya sabit kesalahan boleh didenda tidak melebihi RM 2,000,000.00 (Ringgit Malaysia Dua Juta) manakala bagi kesalahan berikutnya tidak melebihi RM5,000,000.00 (Ringgit Malaysia Lima Juta).

8. Kementerian juga akan mengambil tindakan tegas dengan menggantung sementara lesen stesen minyak yang terlibat sehingga siasatan selesai dijalankan dan keputusan kes dimuktamadkan.

9. Selain itu, syarikat ini juga akan disiasat di bawah Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram 2001 (AMLATFPUAA 2001) (Akta 613) iaitu kesalahan pengubahan wang haram bagi tujuan mengesan, membeku, menyita serta sehingga ke peringkat perlucutan hak ke atas apa-apa hasil pendapatan atau harta yang dijana daripada aktiviti haram penyelewengan berkaitan minyak diesel.

10. Jika disabitkan dengan kesalahan di bawah Akta 613 ini boleh dipenjarakan selama tempoh tidak melebihi lima belas (15) tahun dan juga boleh didenda tidak kurang daripada lima kali ganda jumlah atau nilai hasil daripada aktiviti haram atau peralatan kesalahan itu pada masa kesalahan itu dilakukan atau lima juta ringgit yang mana yang lebih tinggi.

SHAMSUL NIZAM BIN KHALIL

Timbalan Pengarah Penguat Kuasa (Operasi)

Kementerian Perdagangan Dalam Negeri

dan Hal Ehwal Pengguna

SEREMBAN, 13 April 2022

LATAR BELAKANG

Kementerian Perdagangan Dalam Negeri dan Hal Ehwal Pengguna (KPDNHEP) telah ditubuhkan pada 27 Oktober 1990. Matlamat penubuhan Kementerian adalah untuk menggalakkan pembangunan perdagangan dalam negeri yang berdaya maju, berdaya saing, dan berdaya mampan, khususnya di dalam sektor perdagangan pengedaran. Sektor perdagangan pengedaran adalah antara penyumbang utama KDNK negara dan ia bertindak sebagai benteng kestabilan ekonomi, terutama semasa situasi ekonomi luaran berada di dalam keadaan ketidakpastian. Perdagangan pengedaran perlu kukuh bagi menampunkan sebarang ketidakstabilan dalam ekonomi negara.

Dalam masa yang sama, Kementerian juga komited dalam melindungi kepentingan dan hak-hak pengguna. Ini termasuk membangunkan ekosistem pengguna dan peniaga yang bersifat melengkapi dan ke arah *self-regulated*, seiring dengan aspirasi ke arah masyarakat negara maju. Ia diharapkan akan melahirkan pengguna dan peniaga yang matang dan beretika dalam berurusan niaga, dan hasilnya adalah negara yang seimbang dari segi ekonomi dan sosial.

Agensi di bawah KPDNHEP :

